

柳田文庫
文庫11
D 147
1



文庫11
D 147
1

010190553502

卷之二
卷之二

神

連平范氏
雙魚室刊

元人選元詩五種

河汾諸老詩集八卷

膠州柯氏藏元刊本

國朝風雅七卷雜編三卷

唐風樓藏元刊本

大雅集八卷

藝風堂藏影洪武本

敦交集一卷

藝風堂藏舊鈔本

偉觀集一卷

藝風堂藏舊鈔本

--	--	--	--	--	--	--	--	--	--	--	--	--	--	--	--	--	--	--	--	--



河汾諸老詩集卷之一

雙魚室校刊書籍記

橫汾隱者房祺編

貽溪麻先生革信之

上雲內帥賈君

北極長虹掣西垣太白高千年知運圯四海
 共兵塵霧黑龍蛇閉山昏虎豹嗥石傷填海
 羽波動負山鰲遺介潛寒渚驚鼉走夜牢江
 山留慘黯天地入君蒿衆折思枝柱初寒俟
 蜃縹明良逢慶會鄉曲得名豪梁棟因人出
 舩舡為世操安流欣鼓柁奔浪獨能篙日出

戈揮景江翻弩射濤風聲連頊洞裁鑿悉織
毫桃李勤封植茅菅日薙葦獵場游鹿庶魚
渚動鱗劔井邑生春色禾麻飫土膏民歌烏
逸屋士喜馬騰槽朔塞閑刁斗天山擁節旄
岱嵩何落落江漢自滔滔大寶珠仍壁長城
雉與壕崇牙分榮戟大壤屬韃橐日月依龍
德風雲挾豹韜夾山群戰騎黑水沫輕舠落
日觀魚浦秋風射雉臯化行家置塾役簡里
停鑿歌奏投壺室文閑治獄曹西庵談性理
東閣會竒髦森爽開璜璣縱橫列鴈羔禮容

新泮宇物性遂莊濠牧唱聞朝起樵音聽暮
號孤嬰收坎阱流滯起蓬蒿屢下陳蕃榻誰
空北海醪邵軍敦禮樂曹館富風騷客望龍
門聚雛從鳳穴翺世知三窟隘人可二天迤
雨露承恩命山河襲世勞功名高衛霍輔弼
慕伊咎鞍馬憐驛肉簪纓視鬚毛雅申張仲
德頌入魯侯昭有客傷淪落無塔寫鬱陶太
行雲幕幕代北雨騷騷去國心將折懷人首
獨搔身如伏櫪驥情似失林猱涸轍將安往
窮途况所遭幸今逢石直欲啖醪糟付已

誠無有登門亦已叨沐薰良備至感激欲號
咷已客馮驩舍猶傷范叔袍鳴湏開匣劍割
欲試鉞刀杞梓容山木包羞薦沼芼每思休
困頓佳蔭有蘭草

送杜仲梁東游仲梁先稱善夫

野馬何決驟飛雲何悠颺商崑不足稽此士
又欲東略宋與梁青山不知老白日乃許忙
菊潭之水清泠淵野人飲之得長年芳醲不
買壽淡泊差可久北山峩峩蒼翠巔丹崖石
老生紫煙靈芝秋杞老霜骨黃精茯苓飽新

斲望君嶄嶄病以癯酌之食之可以還膚腴
況有劉荊州元丹丘子寧舍之汗漫遊涼秋
佳月酒一杯送子東下心徘徊半山亭前一
茅屋歲寒霜勁君當來

短歌行送秦人薛微之赴中書

河流宿層氷山有太古雪翩翩有客來老面
黑於鉄盤盤胃臆間猶挂太華月不肯下貴
勢便欲叫雙闕朔寒衣裳單路遠馬蹶躡昔
人丈夫事肝膽不可越我歌送君行歌聲何
激烈悲風為我起酒行歌半闕望君青雲端

何恤遠離別

關中行送李顯卿

關中行我持一盃酒送君西入秦秦川鬱相
望渭水流沄沄黃河中折倏復來太華倚天
青壁開我送君兮渺何許春風不肯吹君迴
舉酒酌五陵浩歌登高臺終南之山何崔嵬
長安舊游安在哉百年繁華成劫灰千古英
雄沉草萊風塵頽洞豺狼暮天地茫茫入煙
霧我載歌送君去太華終南宜有深絕處崑
崙人跡所不到石壁蒼苔老煙雨 堂挂女

蘿充腹多薯蕷玉井蓮開十丈花茯苓根結
千年樹白雪青松良可老康門有龐商有皓
不然凌雲學輕舉呼取安期羨門語憶昨與
君友相逢日日酬杯酒酒闌起舞肝膽開小
桃唱罷歌楊柳晉語狎秦癯秦談驚晉叟秦
晉之交那可無胡為不作雙飛鳥碧草離離
生早春哀歌望斷西南雲求君于終南之上
不可得大華峰頭會見君

阻雪華下

愛山久成癖得山真雋永太華隔風塵五年

夢幽境傳聞十丈蓮擬扣玉仙井雪花忽迷
漫蒼巔墮昏暝蹇予世緣深方外久自屏意
是希夷君俗駕踈造請行風撼林稍稍雲度
嶺雲間三峰面隱約露芒穎初如灑瀨堆屹
起勢奔猛漸如倚天劔萬仞鐵花冷煙霞半
明滅瞬息變光景乃知造物心相哀亦相警
歸鞭晚忽忽回首心耿耿浩歌夜深寒孤月
掛峰頂

置酒半山亭得秋字

懷抱久不寫兀坐如繫囚永懷西山勝浩蕩

成茲遊崑壑互窈窕叢蘿鬱深幽飛煙入虛
無長風跨崑丘楚甸散林莽商顏亦綢繆雷
雨天地空景氣入夜浮况當節律變萬物颯
以秋雲來白日慘天澹清江流西望渺閔河
沉沉生暮愁蘭若暗幽谷芰荷老芳洲一笑
舉酒觴浩歌聊自酬幽賞興未極慨歎心悠
悠世事蒼茫外寒沙明白鷗

歸潛堂為劉京叔賦

逃淵魚深處避弋鴻冥飛古來賢達士亦復
歌采薇南山先廬在兵塵悵睽遠山空無人

居惟見草木肥翩然千歲鶴一朝復來歸新
築臨渾水行逕窈以微清流鳴前除白雲入
晨扉迴顧陵谷遷萬事倏已非著書入理奧
得句窮天機前路政自迫此道儻可幾殷勤
抱中璧黽勉留餘輝第恐遜世志還負習隱
譏求懷泉上石一觴與君揮惜無陵風翰遐
舉非所希

守約齋爲呂仲和作

讀書不務博造道當入微一理貫萬理一岐
會衆岐譬彼庖丁力驕然解牛時節間即有

得肯綮寧復疑道喪向千載聖遠孰可期養
勇敵所愾養氣動以隨心非安如山遇變鮮
不移吾門有聖學觀心乃其師宴坐一室中
自得實在茲胡為滯紛感紉繹如蠶絲人生
矧多欲事物日以滋牛羊踐徑蹊虎豹攻藩
籬我嘗叩天理誠明不容欺第恐達者事還
爲狷者嗤

楊將軍垆馬圖

古人相馬不相肉畫工畫馬亦畫骨淡淡生
絹一片雲眼中群龍何突兀飛莧汗血天驥

種筆墨之間見飛動前趨後逐互有態涉嚙
行留分向背豐草長林性本真駟駟駟駟相
與馴開元天子盛監牧四十萬匹錦繡屯人
言息馬戰所重風鬣霜蹄惜無用君不見幽
燕飛鞚時中原流血成淵池抵令征討苦未
休金鞍鐵甲彌山丘安得放歸如此馬飲水
求芻恣閑暇

題李氏寓酒軒

吾聞李謫仙一斗詩百篇酒家眠又聞陽諫
議月廩盡以送酒錢伯倫酒德頌無功醉鄉

仙說到飲中理茲世何渺然古來賢達士以
酒全其天所以陶靖節浩歌歸園田獨余醉
翁之意不在酒樂在山水靜所便古人已矣
不可作今人紛紛亦能賢北里富燻天高樓
歌舞筵千金結客多少年哀吹豪竹倒傾玉
舫以酒互爲市地勢相嬋媯焉知貧士貧到
骨健倒仰天歌黃鵠黃鵠歌罷無翼飛妻啼
兒號書一束借問主人翁心跡誰與同我亦
頗解飲聖賢時一中酒酣擊尊破兩耳生春
風安得園綺遇携我入山去清泉為釀碧溪

深醉卧溪頭弄雲月

廬山兵後得房希白書知弟謙消息
聞道王師阻渭津廬山以後陷兵塵軍行萬
里速如鬼風慘一川愁殺人亂後僅知家弟
在書來疑與故人親夢中亦覺長安遠回首
關河淚滿巾

晚步張鞏田間

地入荒蕪過客稀村深門巷暮山圍悠悠獨
鳥穿雲下策策寒烏掠日飛人事百年梧葉
老秋風萬里稻花肥兵塵河朔迷歸路惆悵

平沙送夕暉

板橋道中

篔竹瀟瀟野水濱光風過眼與時新陰崖積
雪猶含凍遠樹浮煙已帶春世故未應悲古
道歲華聊得伴閑身蕨芽筍稚行當好莫擬
山中問主人

過陝

萬古津茅據上游峻函西去接秦頭悲風鼓
角重城暮落日關河百戰秋形勝古來須上
策塵埃歲晚只羈愁豺狼滿地荆榛合目斷

中條是故丘

爲王德新壽

百年人物惜凋零尚喜衣冠見老成數口藿
鹽憂桂玉一川風雨獨柴荆紅顏未羨方春
好黃髮應從此夜生異日華林講殊禮不妨
鳩杖從公行

爲秦人梁帥壽

功名萬里駕龍荒不作當年陞楯郎顏角久
瞻天上日鬢毛未點鏡中霜衣沾暑雨千秋
潤扇引薰風六月涼見說長年出冲靜海山

求藥本微茫

送申生取新赴中書

寒山漠漠日初曛過盡瀟瀟鴈鷺群百代高
歌餘白雪一朝飛步上青雲倚門翫驪誰怜
我滿腹精神獨見君看取扶搖便鵬翼臨岐
且莫嘆離分

寄杜仲梁

塞上愁多雲易陰故人雖在鴈無音交情念
子黃金重世故稽人白髮深芳草春風千里
夢青燈夜雨兩鄉心岱宗入眼東南秀悵望

雲山淚滿襟

寄元裕之

朔雲陰雪晚重重日入寒蕪塞草空沂水東
回無去翼天山南斷有哀鴻三年遠別交情
外一夜相思客夢中明日關河對雙淚祗將
幽憤寄秋風

竹林院全張之純賦

柳色侵尋映短籬竹稍零亂挂殘暉山禽自
識忘機客飛下庭柯更不飛
稍稍林間布穀聲村南村北水雲平偶來竹

寺看山坐閑聽清溪遶舍鳴

中書大丞相耶律公挽詞甲辰五月十四日

砥柱中流折藏舟半夜移世賢高允相人嘆
叔孫儀未拜荊州面嘗蒙國士知無階陪引
紉萬里

又

文獻群公表東丹八葉傳珪璋貽嗣德蘭藻
靄遺編禁籍虛青瑣神游定玉泉太常千字
誄誰有筆如椽

蜜國公挽詞

鬱鬱佳城閉翩翩銘旌開風悲信陵墓雨入
孝王臺萬古傷梁壞千年望鶴來平明國門
外蕭鼓不勝哀

又

漢制隆恩禮周列屏翰人知尊帝胄我但
識儒冠傷蘭桂孤高歎鳳鸞從今門下
客長缺向誰彈

王子壽鄉友生朝

自接夫君席頻逢歲律更面嚴知氣直語出
見生平講學詩書義論交里社情須髯如戟

在長對玉峰明

送李端卿之鄴臺

僮馬戒晨裝新霜未葉黃嗟予無壯節送子
慘離腸林慮荒秋色清漳下夕陽遙知一尊
酒吊古

爲喬子壽

講道顏淵卷新齋友與同守身為大節寡欲
是全功教子勤書裏娛親養疾中黃花佳節
近歲歲看秋風

贈劉伯威

劉子山中秀相逢氣自同箕裘門戶計菽水
古人風折節豈為辱苦心應有終平生湖海
志未用哭途窮

贈王明

遼海遺珠玉黃 秀木空百年書法裏萬事
酒盃中耿耿此心在悠悠吾道窮好賢明達
事獨喜與君全

秋夜感懷

老境歡娛少愁懷感歎長世途多險阻歸興
渺滄茫踈雨梧桐夜西風蟋蟀床平明攬青

鏡衰鬢又添霜

趙太監降日

自從龍戰野特立孰如公著跡雲鵬上收功
汗馬中高談天下計餘事古人風勿藥行逢
喜春風兩紅

雲中夜雨

憔悴壯陵客悲涼王仲宣四圍晴立壁一突
午無煙病卧秋風裏愁吟夜雨邊明朝誰裹
飯萬一使君憐

渡洛

泉石經行久林丘弭望間溪鳴風蕩水谷暗
雨含山淡淡輕鷗沒飛飛倦鳥還世緣良日
苦空羨野雲閑

浩浩

浩浩春風裏悠悠倦客情天寒花寂寞冰泮
水縱橫念遠心將折聞兵夢亦驚江山憔悴
久倚杖嘆餘生

河汾諸老詩集卷之一

河汾諸老詩集卷之二

橫汾隱者房祺編

石泉張先生字彥升

送趙宜之歸辛安兼簡洛下諸友

悽惻復悽惻送君汾水側人生歡會少一別
難再得昔經劫火然二鳥奮驚翼嗷嗷各何
之全落天西北日夕相和鳴此樂未易極狂
風忽吹散一鳥歸故國翱翔入寥廓萬里期
一息鄧林有餘陰未肯栖枳棘玉山有嘉禾
未肯求粒食一鳥獨未歸韜韞老無力矯首

思舊群潛然淚沾臆

雌鷄行

雌雞粥粥將鳧兒鳧兒入水雞鳴悲岸南岸
北飛且隨但恐搏攫遭鳶鷂岸傍無食寧飢
死朝暮不肯須臾離傍人爭笑愚且痴我哀
物理為人欺

雲溪秋泛圖為閩國寶賦

晴嵐滴翠霜樹殷石錦錯落苔花班人家隱
約荒靄外但見籬落連柴関兩山中斷忽空
曠下有碧水之潺湲幽人航葦迷遠近思致

偃蹇無容攀定非鳴夷成霸業一舸五湖煙
浪寬又非坡仙遊赤壁酒酣浩歌江月寒亦
當拄杖橫膝看南山心與白雲相對閑胡爲
厭山瞰芳渚岸草汀花適幽趣有聲詩畫無
聲詩夏蟲未易寒冰語或云此本張季鷹蓴
鱸忽憶扁舟輕蹇予有家歸未得一見秋風
羽翼生

採蓮分得底字

溪風搖搖波瀾瀾十里芳華照清沚蘭舟女
郎紅玉春日射新粧明水底芙蓉雙檢百媚

生吳宮西施漢良娣藕腸折斷雪絲牽入手
花枝香蕩蕩隔岸誰家貴公子調笑新詞歌
艷體吳儂變風有如此誰念采蘋供祭禮

哭姪

學業方成二紀過虛舟一夕殞頽波死皆有
命怜渠早老獨無依柰我何歸計雲山空莽
蒼愁懷日月暗消磨白楊半夜風瀟瑟盡是
吾兒薤露歌

感懷

世路羊腸劇險艱天心應厭著儒冠老無子
息心易貧交親託事難文字售人真滯

貸廉平養已 閑官羲經讀罷無人會庭竹
瀟森夜月寒

吊蕭同知

蕭蘭一夕殞秋霜數載交情遽忍忘遊覽雲
山春並戀笑談風雨夜連床治心我謂當誠
慤處已君言貴肅莊此理從今誰與論隰州
林月澗蒼蒼

上巳日遊平湖

微風漠漠水增波禊事重脩繼永和脆管當
筵清似語扁舟爭岸疾如梭一時人物成高

會千里雲山入浩歌日暮芝蘭無處覓野花
汀草占春多

送田茂卿赴都

宿雨初晴草木齊一杯汾水恨分携上林曉
色多鶯友長路春風入馬蹄黃卷可能無斗
祿青雲自是有天梯從來俊傑知時務莫為
寒窓故紙迷

和李子微村居

健羨南溪老幽居水石間心無塵事汨身與
野雲閑院靜深藏竹墻低易得山蒲團香一

炷花落鳥喧喧

又

別野荒城外居閑事事幽栽松添野色接鉅
引溪流詩社分新韻村醪洗舊愁更求名與
利騎鶴望揚州

送李仲暉之洛

同是思鄉客君先著祖鞭驪駒歌落日去鴈
入高天莫戀河濱粟當耕谷口田親朋儻相
問為報已衰年

送馬德新

馬弟吾鄉秀青雲正壯年四知雖自畏六戒
得師傅秦府開賢路瀛州列俊躔秋風黃鶴
健老眼看高騫

贈黃甫德璋

明德本生公醫名一代椎杖頭閑日月舌上
舊家風雅趣錢神外高情酒聖中治人陰德
在壽骨秀而豐

和劉敏之韻

城居盛不好未易著閑人客至慙無酒詩成
莫療貧談天雖有口無地可安身羨殺清江

鷺生來不受塵

秋日出郭

離離禾黍滿郊墟棗實紅殷接野閭四十年
來無史筆有年今日仗誰書

和李濟夫韻

午夢遊仙鳥喚迴竹陰掃地靜無埃莫言嘉
客閑中少時有清風自往來

荆公

作古非今禍已成亦知鬼責與天刑試看一
病遺言處猶勸傍人誦佛經

襄陵北城溪坐

楊柳陰陰水氣涼
椒花蕪蕪野風香
地偏愈覺似閑整
始信擒昌化日長

閑述

此性生而與道俱
靈源常患少人疏
楊侯一語崇經學
士子爭相讀四書
解作時文一二篇
胸中意氣已掀然
何如剖破醯鷄瓮
看取人間大有天

河汾諸老詩集卷之二

河汾諸老詩集卷之三

橫汾隱者房祺編

陳先生賡子颺

遊龍祠

黃河如絲導崑崙萬里南下突禹門枝流潛
行大地底派作八道如霆奔吾聞川真嶽靈
有冥宰况乃利澤開洪源神龍窟宅瞰平野
千古廟貞何雄尊深林含蓄雷雨潤冷殿似
帶波濤痕我來南州走塵坭執熱未濯憂思
煩試酌甘冽洗肝肺一勺注腹清且嫩悠然

晞風坐東廡倏見繪畫如飛騫仙官華裾乘
朱軒旗纛掩藹蛟伏轅雷公電母踏煙霧天
吳海若驅鼉鼉何時借取霹靂手倒挽銀漢
清乾坤廟前老翁顧我語孺子未易排天閹
胡為高論乃如此一笑滿面春風溫是時三
月遊人繁男女雜還簫鼓喧騫菱沉玉荅靈
貺割牲醢酒傳巫言巫言恍惚廟扉闔拜手
上馬山煙昏

峴山秋晚圖

太山高嵯峨小山

嶺清江錦樹帶秋煙

煙際人家在林藪荆河迤南三峴山此圖定
繪襄陽否詩人翰墨丹青手落筆天機隨所
有峴首真在襄陽西遙觀漢水含風猗上有
龜龍一片石云是羊公墮淚碑試披禹跡考
地志畫師寧免詩人疑且看滿眼江山好休
作燕人過晉悲

子猷訪戴圖

兩晉崇玄虛風流變華夏舉世尚清談天地
指一馬依阿竹林賢鴻名重天下王郎衣冠
冑亦復慕草野偶來剡溪上溪水正清瀉扁

舟信公洄氣韻可瀟灑誰與好賢心丹素入
圖寫山陰懷古意欲攬不盈把賦詩心夷猶
六義愧騷雅西風塵冥冥倘有知音者

鐵柱杖

閩王鐵杖如榔栗得自荒虛鬼神域鞭笞蚤
蠻今幾年霧翳雲蒸老蛟黑腹中有筐如細
泉牙節宛轉聲鏗然天生神物不虛棄提携
萬里歸坡仙坡仙騎鯨凌紫煙海山一去今
千年人間俯仰成今古紛紛長物何須數洛
陽銅駝卧荆棘昭陵石馬埋煙雨百斛鼎兩

錢錐小大用舍俱兒嬉商顏鶴髮一筇竹何
似凌煙功臣玉具高椿頤黃閣得君真耐久
扶持四海經綸手會須柱到崑崙顛九點青
煙看九有鐵邪杖邪吾不知誠將道眼窺天
機一朝雷雨轟空陂須防化作蛟龍飛

武善夫桃源圖

武郎種桃滿雲溪三月紅雨行人迷自從王
勒入雲馭春風杜宇年年啼飛黃騰踏有天
倪紫電轉盼天山低要將白壁沽娥眉更把
黃金鑄屐蹄羲和挾輶六龍馳暮景恐迫虞

淵西新詩擬喚槐安夢咫尺溪邊春色動飛
花漠漠水泠泠蒼苔荒了煙霞洞聞道西風
解斲人何處江山可問津征塵障斷仙源路
且看丹青萬樹春

送李長源

月下孤鴻枕上鷄高城今日又分携九秋雲
氣峻陵底萬里河聲砥柱西飲罷關山秋寂
寂詩成風雨暮淒淒千金善保并州噐要放
崑崙入馬蹄

寄陝郡楊正卿

西菴

臨川 上看飛鴻十載西州一轉蓬親老家
貧初有累才踈意廣卒無功姦雄頗忌孔文
舉富貴何如張長公滿地塵埃浮世狹一帆
思駕五湖風

又

遷客形容國士心春風鶴髮不勝簪鍾儀去
楚衣冠異王粲依劉歲月深歲晚艱危無短
策酒酣悲壯動長吟遙憐蘭省楊夫子一紙
書來抵萬金

宣宗挽詞

洛邑周初定蒼梧舜不還九天來鶴馭萬國
泣龍顏儉德高千古鴻勳際兩間無由望弓
劍雲氣鬱橋山

寒食祀墳迴登臨晉西原廢寺

前朝廢寺枕山河尚有摩雲宰堵波故國已
非唐日月老僧猶指晉山河年來筋力登臨
倦亂後心情感慨多石蘚荒碑碎文字他年
更得幾摩挲

當年雲構倚天開一夕煙塵化劫灰佛閣丹
青餘瓦礫禪房花木亦蒿萊春風萬里騷人

怨落日千秋杜宇哀
斷礎荒煙無限意
一章詩律為誰裁

送寇輔臣

古陌風塵點客衣
送春亦伴春歸
東風不管離人恨
吹落楊花滿地飛

蒲中八詠為師崑鄉賦

蒲津晚度

雲濤注壺口水府蟠九壘
公子莫爭舟蛟龍
方駝駁

虞坂曉行

伯樂沉九原泥塗困騏驥
千古長坂空無人
知此意

舜殿薰風

崑廊鳴五絃薰兮南風來
鳳去徽音絕
智井生莓苔

首陽晴雪

天風吹瓊瑤白冒首陽頂
欲和采薇歌
千山凍雲冷

東林夜雨

林壑冷含秋風雨
黯如海何如
贊公房青燈

淡相對

西崑巒巘

梵刹盤空曲烟霞錦繡紋山靈倘招隱徑入

萬重雲

媯汭夕陽

奠階降英皇此地嬪有虞南巡竟不返愁雲

接蒼梧

王官飛湍

縣流落雲崑遙空挂飛練何時輟清冷一類

黃塵面

河汾諸老詩集卷之三

河汾諸老詩集卷之四

橫汾隱者房祺編

陳先生庾子京

送麻信之內鄉山居

四海紛拏戰虎龍
驚麇無計脫圍中
莫貪利祿招時忌
要學聱牙與世同
汝水應逢寒食雨
川行舞雩風
離心洗蕩方如許
莫上危樓聽斷鴻

吊麻信之

弊疑功名懶著鞭
劇談豪放本天然

每

愛從人語醉裏何妨對客眠
体瘁漸成酒病家
貧全仰賣碑錢
堂一去今何在
三尺孤墳罩野煙

風采瓊林未足侔
一朝零落委山丘
君恩未賜金蓮炬
天闕俄成白玉樓
詩珠尤可翫
室如懸磬更堪憂
路遙未暇憑棺奠
悵望中條涕泗流

荅楊煥然二首

梁苑當年記盛遊
亂離南北悵遲留
且教紅歌金縷莫對青山嘆
白頭人似贊遷蜀

郡詩如子美到瓊州傳家况有玄文 應使
童烏繼纂修

獻賦當年覲紫宸羨君藻思獨超群扶持吾
道難尤力潤色斯文老更勤學際天人寧有
伴文如風水自成紋何時載酒清伊上寄字
時來問子雲

清明後書懷

花氣薰人動竹齋貪春狂思若為栽蜂粘落
絮飛還隊燕認新巢去復來亂後精魂猶夢
境貧中風景剩詩才江山信美非吾土懷抱

何時得好開

送孟駕之赴闕

文史相從二十年歲寒心事久彌堅向來才
力驚游刃此去功名穩著鞭淺綠羨依沙漠
草橫青遙指拂廬煙應將萬字匡時策挽取
恩波下九天

病後贈姚仲寬居士

寂寂柴關晝不開虛簷獨步意徘徊百年素
業南柯夢一寸丹心古鼎灰野老相遇聊問
訊禽近啄不驚猜好奇誰是劉公肯為

楊雄載酒來

有懷家兄子錫

蕭蕭雙鬢半成絲
疊疊襟懷抱所思
趨向自知違俗好
文章只合伴兒嬉
嵩西晚照霞明處
洛汭秋風鴈過時
中有先人弊廬在
與君何日理茅茨

贈李彥誠

五嶽分崩四海傾
便宜一別盡今生
艱難契闊重相見
四十餘年老弟兄

峴山秋晚圖

當年叔子愛茲山
陵谷回頭幾變遷
縱使豐碑今尚在
遊人誰復一潸然

題師崑鄉蒲中八詠

蒲津晚渡

中條山色照黃河
競渡行人晚更多
城上危樓倚霄漢
凭欄有客正悲歌

虞坂晚行

五更風露正清冥
馬首殘蟾分外明
好句墮前俄失去
微吟倏過古虞城

舜殿熏風

德化當年被海隅熙熙物性盡昭蘇不知今日吾民愠一聽琴聲解得無

首陽晴雪

山頭晴雪照城樓潑水融銀眩兩眸蕩滌寒城須羨醞浮香醞醪夜來蕩

東林夜雨

瀟瀟寒雨濕觚稜古殿長廊夜氣增此地此時誰得意龕燈一點坐禪僧

西崑豐巘

螺鬟煙髮矗萬峰行人指點梵王宮鳥飛杳

靄蒼茫外人在霏霞空翠中

媯汭夕陽

水曲山河古樂鄉聖謨曾此降英皇遺風欲問應無處破屋頽垣半夕陽

王官飛湍

表聖當年愛此山倚樓終日看飛湍後人空飲貽溪水不學先生便挂冠

河汾諸老詩集卷之四

河汾諸老詩集卷之五

橫汾隱者房祺編

白雲子房先生皞希白

江上行

浮雲澹澹心悠悠杖藜來作江邊遊商人打
鼓催行舟洪波不斷東南流木葉蕭蕭荆楚
秋勸君休上王粲樓日落滄江增暮愁

賣劍行贈常漢臣

滄海波未澄無人斬長鯨常郎三尺玉匣中
鳴不平蛟龍一出雷雨隨翕忽變化清四夷可惜有

才不見用青天白日將何為酒酣起舞抱劍
哭蕭蕭悲風動茅屋不如南山學種田自古
青萍換黃犢

扣角歌贈史吉甫

剝剝剝扣牛角自從破却黃雞殼陰陽二氣
分清濁異則為風震則雷流者成川峙者嶽易
道常行日用間醉夢昏昏人不覺伏羲不得
已而畫文王不得已而重叔世不及上世隆
夫子不言人益蒙著成大傳開盲聾譬如日
出滄海東無物不在光明中峨嵋山人史居

士來到公安大智寺手携牛角欲何為發明
三聖心中事人言康節是前身但不家居洛
之溪育中一部皇極書造化功夫際天地舒
之則彌滿六合卷之則不盈一握近之則在
乎目前遠之則入乎冥邈有人來問先天學
扣牛角剝剝剝

貧家女

貧家女德性溫柔寡言語終年辛苦不下機
身上却無絲一縷倡家女兒百不會只向人
前賣嬌態繡裯端坐青樓中銀燭熒煌照珠

翠書言福善與禍淫未必天公有此心盜跖
長年顏子夭古來顛倒非獨今高處是崑崙
低處是東溟崑崙推不倒東海填不平物之
不齊物之情貧女莫羨倡女榮不義富貴浮
雲輕持身但如冰雪清德耀荆釵有令名

送王升鄉

傷哉船子峰頭月昨夜團團今夜缺月華猶
自不長圓人生安得無離別世上憂端千萬
許惟有別離心最苦盧川春晚送君行落花
為我啼紅雨四海紛紛尚戎馬我曹只合歸

林下如椽大筆今無用日課新詩自陶寫嵩
陽佳處如罨畫浮可漁兮田可稼我欲從君
覓隱居却恐山靈嫌俗駕

題呂仙亭

岳陽城南呂公洞道人見客無迎送事少方
知日月長身閑未覺功名重竹影松陰生午
涼山色湖光設朝供高吟下視世間人幾人
不在黃梁夢

寄呈岳陽諸友

稟性太褊率不受塵事觸自小遠市廛僻居

在崑谷人間嗜好心舍書百不欲一飽更奚
求簞瓢隨分足失脚墮世路纏糾若微纏人
以官為榮我以官為辱平生喜高潔為官近
卑俗平生喜曠達為官窘邊幅平生喜踈散
為官貴圓熟平生喜忠鯁為官多諂曲澆漓
當此時古道那可復鷓鴣巢一木偃鼠飲滿
腹誰能朱門中區區勾梁肉折腰趨下風不
厭解印速青山喚我歸早晚謝羈束一尊石
上酒浩歌對松菊

題張信之見山堂

自古朝市人罕與山相會山豈欲遠人人自
與山背張侯創新居正在闌闔內何以得青
山坐上日相對曾中有丘壑眼前無障礙人
物既蕭散山不問內外晚來天氣佳收目入
清快乾坤無一塵草木有多態千里好風來
幾縷殘霞在柱笏當此時未覺功名大

慶王鼎玉生子

魏侯照乘珠卞氏連城玉此物豈易得君家
貯滿屋平生積德深天錫以多福熊羆入夢
頻不待封人祝長者已雄偉幼者更清淑指

日看騫騰誰為犀角禿願君剩買書學語便
教讀斯文久不振六經要再續人生宇宙間
百歲一瞬速美惡暫時休何者為榮辱且引
昔寧馨遶院種松菊陶潛歸去來有子萬事
足

戊子

萬事人間已飽諳一身猶自客天南行非揚
秉三無惑性似稽康七不堪俗學為名多外
飾聖人養德貴中函有時靜坐深思省三十
年前總是慙

寄段誠之

咫尺春風三十三不如歸卧舊煙嵐浮雲富
貴吾何慕陋巷簞瓢分所甘多語數窮深可
戒虛名無用不宜貪寥寥孔學今千載賴有
斯人可共談

次前韻寄王升鄉

谷口人家十二三家家牕戶得晴嵐千章雲
木秀而野一脉泉流清且甘徇俗到頭終是
病耽書自古不名貪作詩為問東溪友樽酒
何時愜笑談

辛卯生朝呈郭周鄉段復之

瓮面醯雞積有年近來霧豁見全天出言最
忌談人惡入德尤宜去自賢回也屢空趨聖
域參乎一唯得心傳佛岐老徑雖高絕不及
中庸道坦然

贈趙山甫

寇盜連年劇蝟毛一身無處可奔逃陳平自
合西歸漢葛亮焉能北事曹嗟我命兼才共
薄仰君名與德俱高幾時一笑滄浪畔右手
持盃左手螯

笑楊叔能

仰看飛鴻俯看鱗
計來不覺淚沾巾
風塵末路尤多難
山澤癯儒只合貧
亂後有誰收恨骨
眼前無復見斯人
襄陽舊隱依然在
花落空庭冷淡春

送李正甫九日韻

論著哀時總可哀
不如且放笑顏開
留連風月憑詩句
管領江山有酒盃
我欲處身如此處
君言裁恨若為裁
從今但有錢三百
相約高樓盡醉迴

憶新墻劉德淵

雲煙杳靄水微茫
何處青山是岳陽
白髮滿頭空自老
黃塵兩腳為誰忙
同盟鄂渚言猶在
偕隱廬峰興未忘
近有倦游詩數首
西風吹不到新墻

思隱

得箇黃牛學種田
蓋間茅屋傍林泉
情知老去無多日
且向閑中過幾年
詘道詘身俱是辱
愛詩愛酒總名仙
世間百物還須買
不信山也錢

寄王文炳

愛客孔文舉能詩陸士衡十年求識面千里
飽聞名郁郁芝蘭秀蕭蕭風露清幾時樽酒
畔容我話平生

和楊叔能之字韻

遭亂重相見寬心不用悲江山佳麗地人物
太平時白蟻千家酒黃花九日詩鹿門不可
隱吾道欲安之

丙申元日

三十八年過星星白髮多干戈猶浩蕩蹤跡

轉蹉跎世事堪長嘆吾生付短歌江湖從此
逝煙雨一漁簑

辛丑巴東元日

舊日逢春喜而今怕見春紅塵長路客殘病
老夫身政拙難書考家貧只累人自冷頭上
髮更比去年新

秋夜

百計求安未得安此心須在鬢凋殘漫漫長
夜渾無睡蟋蟀堂深秋雨寒

自遣

幾見秋風幾見春一愁未已一愁新閑中點
檢平生事唯有清貧不負人
瓮面浮香處處春任他時事百端新自知野
鹿山麋相不是麒麟閣上人

別西湖

聞說西湖可樂飢十年勞我夢中思湖邊欲
買三間屋問遍人家不要詩

題張濟之勝覽軒

誰言山色可忘憂誰道澄江銷客愁試倚欄
杆西北望浮雲依舊暗神州

讀杜詩

後學為詩務鬪奇詩家奇病最難醫欲知子
美高人處只把尋常話做詩
穹礴冥搜枉費功天然一語自然工况兼詩
是窮人物好句多生感慨中
千里奔馳蜀道難草堂賓主罄交歡怒冠三
挂簾鈎上誰謂將軍禮數寬

春日觀菜

手種蕪菁欲療飢春來頗恠發生遲東風貪
長新桃李未有功夫到菜畦

河汾諸老詩集卷之五

河汾諸老詩集卷之六

橫汾隱者房祺編

遯庵段先生克已復之

乙巳清明遊青陽峽

東山氣象太猛悍萬馬駸駸來楚甸中分不
肯割鴻溝鍛礪戈矛期一戰西山折北如西
漢獨餘絳灌奔而殿誰為劉項決雌雄賴有
韓彭力相援盧溝直下兩水合泯泯暗流通
一線突為瀑布出山口流沫成輪浪成旋前
途百步落石甕黛蓄亭亭那敢眇沈沈南去

若白虹為嶼為泚互隱見鑿開混沌幾千秋
世信雖見如不見今人雖有筆如椽為寫佳
名傳寓縣人間佳節重清明呼兒折簡招諸
彥一生能著幾兩屐佳處每欲經行徧山靈
著意勸遊人吞吐煙霞生萬變山阿玉女跪
焚香崑畔仙人一笑倩坐者儼若帝王尊劔
佩雍容侍閑宴植者磊落如鉅人聚立廣庭
議封禪拱者矯矯如勇夫執戈祀花著綦弁
平灘淺瀨乍可揭溪路曲隨峰勢轉葛屨徧
宜苔蘚滑行襟時被薔薇罨當面煙嵐翠舞

蛟出岫閑雲飄素練群行不復事拘檢眼正
明時脚還倦班荆共坐溪上石粗糝濁醪具
時饌良辰無柰夕陽催羽觴正要清歌薦醒
心况復有寒泉玉池遄返成三燕三分春色
二分休風外飛花時一片古人行樂欲及時
半百之前猶掣電惟有愛山緣未斷夢寐孱
顏添健羨一窮到骨不自治虛負胷中書萬
卷謾向山村老却人生來不識荊州面肝肺
搓牙倩酒澆顧我非狂亦非狷紛紛世上無
真是棄置從渠若秋扇歸來新月偃林稍寂

冥衡門掩深院

題興公靜樂庵

我愛興上人閑處先著脚雖有買山錢難尋
一丘壑向來栖息地龍像久寂寞重尋林下
徑竹石若紛薄溪水恣交流崑花自開落却
掃丈室中一餅還一鉢靜樂題其頽塵緣聊
解縛寥寥千歲下此理誰發樂我今為拈出
不免一重錯有淨必有垢無苦亦無樂混沌
元不死七竅剛自鑿珎重庵中人萬法本無
著獨有太古心油然滿寥廓

冬夜自適

四壁摧頽手重泥一枝隨意足成棲歸來已
化千年鶴老去慵聽半夜鷄世事榮枯都是
幻物情長短不須齊寸心耿耿何人會隱几
寒牕片月低

中秋二首

萬籟聲沉暮靄收長河瀉浪洗清秋遙天千
里淡如水明月一輪光滿樓隨意傾銀謀勝
賞誰家橫玉調新愁可怜白首蟾宮客羞對
嫦娥說舊游

夜涼河漢靜無聲澄澈天開萬里晴蟾吐寒
光呈皎潔桂排踈影極分明良宵方喜故人
共醉語那知鄰舍驚一片詩魂收不得九霄
直與月俱清

雲中暮雨在禹門

古壘雲藏一徑微河山依舊昔人非貪微徃
古興亡事不覺城頭雨濕衣

憶梅

姑射仙人冰雪膚昔年伴我向西湖別來幾
度春風換標格而今似舊無

與隱之會午芹精舍酒間雨作

麥田日日起黃埃官長憂民意不開底是山
靈相嫵媚故驅風雨過江來

楸花

楸樹馨香見未曾墻西碧蓋聳孤稜會須雨
洗塵埃盡看吐高花一萬層

河汾諸老詩集卷之六

河汾諸老詩集卷之七

橫汾隱者房祺編

菊軒段先生成已誠之

題容安堂

陳子少英邁逸氣不可挫典刑肖乃翁出語
輒驚座行止非所能造物聽掀簸功名鷹在
韝歲月蟻旋磨區區一室中十載供史課結
廬慕淵明志向有許大淡墨寫形似終日相
對坐一室足我容百念付慵惰青山隱簷楹
流水出階左植花數十叢種竹千百箇事來

若機張事去如瓶墮浩然方寸間不受一塵
汚豈無二仲賢閑暇日相過有酒相獻酬有
詩互賡和溪山入笑談珠玉霏咳唾徜徉天
地間一物莫非我醉來語更真卿去我將臥
主人正高眠山鳥莫啼破

題梁氏靜樂堂

攘攘區中人役心名與利於身竟何有乾沒
不少置叔敬有耳孫犖犖與時異一官不肯
覓閑居養高志築室塵境中中有塵外意方
其厭囂啾歸來行少壑牀頭一卷書靜洗紛

華累苟能樂其樂寧復事吾事見客不吝情
有酒即成醉為問東華塵何如北牕睡清風
吹我懷萬事覺無味誰知方寸間自有清涼
地

蘇氏承顏堂

登僊不羨飛雙鳧宰官不樂紆金珠行年四
十著綵服悲啼效作兒聲呱丈夫豈無四方
志倚閭望望心何如家國無事壽觴舉慈顏
得酒增和舒客來草具對客食殺雞奉母其
榮華富貴固所願有子能盡如君

不動古未有悅親自得神明扶茁哉人生
孟林笋園焉日出姜泉魚古來孝感有如此
今人蓋以古為模嘗聞古有色難戒愛深容
色何愉愉詩成不覺涕淚俱尔有毋遺傷獨
無他年誰作孝友傳請錄吾語為君書

題秋暮山行圖

亂山崒嶽爭清妍寒林寂歷相綿聯人間黃
塵千萬丈一點不到山林邊秋光淡薄秋氣
爽浮雲積翠何葱芊高風淒其脫木葉向來
面目仍增娟江流一曲抱山麓孤舟斜日栖

江湍行人何適來負擔腰膂躡磴石頭路
蹇馱鞭不前人家前塗渺何許望之不及憂
悄悄問公何從得此本筆勢髣髴營丘傳我
本山中人見之心惘然崱嶹歷落真可笑對
畫題詩思昔年

送孫仲文行臺之召

仲也何人斯不滿六尺長言議間英發入耳
音琅琅曾懷湛秋水面目嚴清霜讀書及城
旦跡鳧鷖行自公少餘暇婉愉奉高堂甘
旨未及親有飯不敢嘗顏色或未怡綵又戲

親傍執喪三年中哀慕如新喪回思顧復勞
此意何時忘日聞辟書下且喜還且傷捧檄
念吾親不覺涕泗滂拔英外臺選列布皆珪
璋掾吏湏幾人亦必求循良世人豈無才要
以德自將糾擿誰弗能吾心恐無常詩人有
明誠茹柔吐其剛孝為百行先子孝吾既詳
苟能推此心前路未易量慙慙養雲翼行矣
勿匆忙

醒心亭

窻前流水玉冷冷窻下高人酒半醒喚省邯

鄴枕中夢如看王湛案頭經翛然自得天遊
趣恍若那知地境靈說似功名場上客倦游
時節一來聽

送尋正道

江邊楊柳纒堪折陌上行人還又別春光不
解苦留人兩岸楊花飛白雪江風搖搖吹綠
波欲別未別傷如何願君少住聽我歌後日
重來白髮多

跋三堂王自寫真

解去盤礴真畫史不特濡毛知可矣葛巾草

服常畫我意欲置我山崑裏虎頭于今幾百
年與渠誰後復誰先倏然蛻跡乘風去一笑
相逢喜拍肩

跋秦得真墨

晴窓不用辨犀紋墨妙秦郎已飫聞翠餅瑩
如雅背淨王圖香鄙麝臍薰玉壺賜弟今猶
少易水無良古亦云老我媿非揮翰手兩丸
投贈負伊勤

送馮資深西歸

人間蠻觸日干戈暮四朝三能幾何歸去不

憂瓶粟罄西山雨足蕨薇多

蕭蕭華髮老書生久欲歸田計未成喜聽日
邊消息好故山容得子真耕

三年思慮謾營營重見浮山眼倍青宵次無
塵元自好床頭况有洗心經
候門稚子喜歸來暖熟都無酒一杯抖擻滿
身塵土盡襟懷還對好山開

嗅梅

玉骨那愁瘴霧傷好將經卷伴南荒坡仙鼻
孔清如水老覺朝雲道氣長

題張郎中明臬決圖

志在驅馳禍已胎
笑顏况更為誰開
貧爭飛翰鞭驥去
不覺踰距有康來
天寶承平事久無
弄丸馭背恣驅馳
不期一笑宮中戲
傳作人間小決圖

如夢庵

覺時還笑夢時訛
夢覺其間有幾何
聊爾藏身大槐國
臥看明月上南柯

虞坂曉行

林外晨雞第一聲
隴頭殘月伴人行
未知局

促鹽車下老驥蕭蕭又幾鳴

首陽晴雪

薇歌一曲對青山
萬古千秋老翠巒
望斷空崑人不見
光搖銀海玉峯寒

書師崑鄉蒲中八詠圖

老大溪山入夢頻
聊憑圖畫寫情真
歸歟不及身強健
山有英靈恐笑人

河汾諸老詩集卷之八

橫汾隱者房棋編

允齋曹先生之謙益甫

送梁仲文

聖人既已沒聖道遂不傳異端壅正途榛塞
踰千年大儒起相承闢之斯廓然濂溪廻北
流伊洛開洪源學者有適從披雲見青天我
生雖多難聞道早有緣中歲苦病目不得深
窮研梁君河東秀意氣凌孤騫探道得奧闡
辯說如河懸所知非為 而亦 蹈焉出

口耳者彼我奚足言却来自秦京過我汾水
邊未幾復言別長途北之燕行看舊六翮高
舉凌雲煙功成名遂後歸老河之湍相從講
聖學與子長周旋

感寓二首

中林有幽蘭蘿生雜眾草地僻人不知芬芳
空自好嚴霜凋古木歲晚難獨保願充君子
佩探擷尚未早安得清風來吹香出林表
高梧夾金井脩竹連清池梧葉既蕤蕤竹實
亦纍纍可栖復可食鳳鳥來何時重華不得

見韶樂何能為日暮空嘆息蕭瑟寒風吹

變白頭吟

梧桐不獨老鴛鴦亦雙死靜女懷真心循夫
正如此柰何及未流不知再醮羞中路多反
目幾人能白頭君不見會稽愚婦輕負薪不
肯終身事買臣一朝歸佩太守印悔望車塵
那敢近人生賦命自不齊貧賤富貴各有時
隨鷄逐狗聽所適世事悠悠爭得知

閑中作

雄雞啼一聲驚起五更睡出門何擾擾競逐

名與利冥冥車馬塵白日暗城市蕭條蓬蒿
居獨有犧皇地高情杳秋雲靜性凝止水俛
仰天地間澹然無一事

東坡赤壁圖

先生矯矯人中龍京塵千丈不可容五年一
夢落江海翩然野鶴開囚籠雪堂閉門讀書
史興來飄然弄雲水黃泥坂下醉三更赤壁
磯頭航一葦明月清風共一江邁往之氣無
由降酒酣作賦記清賞袖有巨筆如長杠一
朝騎鯨尋李白人間俯仰成今昔續絃無處

覓鸞膠見畫思公空嘆息

風雪障面圖

頑雲暗空雪正飛老木殭折溪流澌弊裘羸
馬柰寒子便面障風何所之僕夫徒行亦良
苦吻噤不語心應語人生受凍分豈無但願
不作君家奴

秋日雜詩

山中有佳人考盤歌在澗別來今幾時歲月
忽已晏相思不得書矯首望飛鴈

寄元遺山

詩到夔州老更工只今人仰少陵翁自憐奕
世通家舊不得論文一笑同草綠平原愁落
日鴈飛寒水怨秋風黃金鑛裏相思淚幾墮
憑高北望中

秋日懷李仁卿

獨倚斜陽百尺樓故人千里思悠悠陶唐祠
下煙光晚姑射峰前鴈影秋尊酒幾時同李
白雲山多處是并州臨風惆悵無人會一曲
商歌寫暮愁

麻信之為壽

中州人物一元龍卓犖英才魄磊曾濁酒數盃
遺世慮清詩千首傲侯封諸郎照眼三株樹
舊業關心五老峰頭白他年賦歸去綵衣扶
杖看從容

送王仲通

從事西游五見春翩翩書記日爭新懷鄉不
作登樓賦佐府真為入幕賓世事忽驚翻手
雨馬蹄又踏化衣塵古來燕趙多豪傑定有
飛書薦鸚鵡人

上巳日感懷

舊游桃李泥丘塵十六年悲客裏春浮白可
能洗魄磊踏青聊且慰酸辛蘭亭脩禊人何
在庾信傷心賦又新芳草喚愁花濺淚東風
回首一露巾

白菊

數枝的皜照秋清何物為花乃盪馨玉骨冰
肌誇皎潔風璫月珮想娉婷霜迎葉上迷青
女露下籬邊泣素靈見說寒英能愈疾擬開
三逕著茅亭

紅葉

枝上萎黃慘未乾嚴霜一夕總成丹色烘曉
日熈脂暖影濯秋江蜀錦寒南鴈數聲催晚
晚西風幾度見凋殘橫山樓下梨千樹每憶
童年九日看

北宮

光泰門邊避暑宮翠華南去幾年中干戈浩
蕩人情變池島荒蕪樹影空魚藻有基埋宿
草廣寒無殿貯涼風登臨欲問前朝事紅日
西沉碧水東

趙吉甫種德園

培植功夫與日新風光別是一家春
三秋槐茂堂堪構九畹蘭芳佩可紉
桃李陰成應有地棟梁材出豈無人
從今不羨燕山竇五桂聯芳老一椿

寄鄉中故人

十年夢繞故山薇世事悠悠與願違
華表未成遼鶴語青冥空羨塞鴻歸
雲橫北嶺迷鄉眼塵滿西風浣客衣
為報吾州舊親識短書相慰莫令稀

送侯君美歸雲中

暫時相見又相違留滯天涯更易悲
客淚清和秋雨落鄉心杳逐朔雲飛
路經險阻行須穩書報平安寄莫遲
邂逅故人如問我為言貧病未能歸

自趙城還府

簡子城邊過盡春却尋歸路竝清汾
落花亂逐溶溶水遠樹低連漠漠雲
姑射雨晴山似染洞羊風暖草如薰
獨怜疲俗誅求困愁嘆聲多不可聞

讀唐詩鼓吹

傑句雄篇萃若林細看一一盡精深才高不
似人間語吟苦定勞天外心白壁連城無少
玷朱絃三嘆有遺音不經詩老遺山手誰解
披沙揀得金

王內翰從之

往年高步到瀛州豈料東陵是故侯庾信竟
歸周室老劉禎真有岱宗遊山瞻斗仰名空
在桂折蘭摧恨未休鬱鬱佳城滹水上野煙
寒草木經秋

上韓應州

天挺英雄入彀中堂堂自有古人風乘機力
贊興龍業唾手能收汗馬功四海威名方共
仰一時才武更誰同潁川不是留黃霸行拜
中書作相公

懷劉京叔

奕世金蘭契於今只有君英才殊落落餘子
謾紛紛一別幾春草相思空暮雲何時展良
覲把酒共論文

宿雲臺觀

趨程疲永路記宿喜琳宮蓮嶽三峯對松林

俗塵空入夜清詩

一逕通地偏
夢山泉落枕中

中條阻雨

行李淹蒲坂歸期念晉州
高風千葉下寒雨
一山秋澗響頻驚
夢蟲聲亂入愁
酒醒孤館裏心折大刀頭

初秋雨後

積雨蕩煩暑迴風吹早涼
老苔翻舊碧病葉墮新黃
久客應吾道浮生半異鄉
黑貂渾弊盡愁看一開箱

九日

幽

懶慢令節廢招尋無復歡
娛地空驚閉門黃菊晚步屨
紫苔深尚友陶彭

澤悠然

鴈

北塞迎霜雪西風送羽翰
數行天澹澹萬里路漫漫
日落秋聲急江空暮影寒
古人書斷絕矯首望雲端

幽居有感

閑居仍地僻門閉草萊深
車馬無還往詩書

有討尋嚴霜催歲晚破屋覺寒侵計拙煩親
舊誰能數賜金

秋風亭故基

危亭冠雉堞飛構何崔嵬一夕隨劫火變化
成煙灰頽基翳蓬蒿壞道封莓苔蕭條古城
上空有秋風來

除夜

三十七年過勞生強半休此心耿耿吾道
每悠悠感物百憂集思親双淚流春風添一
歲又是五更頭

送李郭二子還鄉

喪亂身為客淹流淚滿衣亦知生處樂未卜
有年歸祖帳臨寒水仙舟漾夕暉春來一相
送腸斷故山薇

中書耶律公挽詞

虎嘯龍興際乘時自有人風雲闇慘淡天地
入經綸忽報台星坼仍傳薤露新斯民感無
極洒淚叫蒼冥

應州廟學釋奠

夜色齋厨肅秋風殿宇清右文遭聖代備禮

引諸生牢醴嚴三獻
豆邊陳兩楹
祭餘同飲
福旭日樹頭明

送李端卿東行

故人有所適
驅馬出東城
紅樹添秋色
青山滿去程
曾為同省掾
偏愴遠離情
別後能相憶
因風為寄聲

子猷訪戴圖

興盡空迴雪
夜舟訪人虛
語亦悠悠須
知汾水多奇士
豈獨王家一子猷

梅影

隔窻渾似李夫人
江月多情為返魂
宛是依舊顏色
向人憔悴立黃昏

秋夜

寂寂江城夜
向閑西風吹
鴈叫雲端
一聲遠過南樓去
月滿碧天秋水寒

臨潼溫泉

琢玉為池浴太真
芙蓉花暖水生春
誰知寂寞千秋後
留與行人洗路塵

長安早發

行李忽忽灑水頭
雨餘涼氣動新秋
五更馬

上還家夢先逐西風到晉州

秋夜聞笛

雲淨寒空月滿樓何人橫玉叶
清秋梁州罷伊州起不盡關山此夜愁

廢宮

斷磚殘礎碎盤花輦路荒涼
蔓草遮玉殿朱樓俱不見壞墻
噫嶙逸人家

過茹越嶺有感

山川良是昔人非北望松楸淚滿衣
三十餘年成底事全家南度一身歸


蒲津晚渡

黃河城下水沄沄舡去舡來幾夕曛
老盡津頭垂釣客柳陰相對白鷗群

河汾諸老詩集卷之八終

河汾諸老詩集後序

近代詩人遺山元先生為之冠先生太原人
太原境與平陽接河山勝槩地土所宜習俗
所尚古今人物不殊至如師友淵源文章正
脉略與之等故河汾間諸老與天下人材無
讓麻貽溪與元老詩學無慊古文出其右公
言也張石泉房白雲與元老游從南者子颺
子京二陳昆仲與元老或詩或文數相贈遺
者遯菴菊軒有稷亭二段之目與元老相次
登第者曹允齋與元老同為省掾日以文詩



講議者或曰允齋雲中應人也吾子列河汾之間得無附會歟不然允齋之先誠應人自客汴梁北渡居平陽者三十餘年發明道學為文楷式指授後進桃李光輝盈溢其門或教授鄉里或宦達四方有二子叔舉季行文筆亦盛傳而况狀元王公趙城人曹之外父也允齋生而隱德光輝汾晉沒而丘壠在焉豈非吾鄉先生歟夫諸老之詩有深而冲澹如陶柳者有豪放如李翰林劉賓客者有輕俗近雅如元白者有對屬切當如許渾者有

騷雅奧義古風大章浸入于杜草堂之域者往年吾友楊君仲德議成此集不幸早世仲德有云不觀遺山之詩無以知河汾之學不觀河汾之詩無以知遺山之大不觀遺山河汾之作不知唐人諸作者之妙不觀唐人之作不知三百篇六義之深意予今纂錄自貽溪至允齋凡八人得古律詩二百一首號曰河汾諸老詩集皞皞郝先生序文於前其不肖繼言于後才識淺陋不能盡其蘊吾鄉學者如林有能慕河汾之派觀

知所興起云大德辛丑歲二月望日橫汾隱
者房祺序

河汾諸老詩集者迺大同路儒學教
授房先生之所編也予一日得之惜
乎諸老一代高名百年清氣已嘗遍
白于天下是集未嘗流布也皇慶癸
丑夏特命工鋟木以廣其傳然而諸
老之學又豈專乎詩也出處大略已
具前序今書是說以告夫後之學者
不為無益云六月吉日尊賢堂高昂蒼

